



KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

SKINA DI INVERSHONISTA

Publikashon 8. 2019

Kotisashon – Eksigensianan Lokal i Normanan Internashonal Parti 2

Esaki ta e di dos parti di kontinuashon di un seri di dos parti den kua nos lo ke duna un komprondementu mas profundo di e funshonamentu di e proseso di kotisashon tékniko. E publikashon aki lo eksplorá e eksigensianan mas importante ku un kotisashonnan – general i tékniko – mester kumpli kuné, pa e proseso di solisitut inisial pero tambe pa e evaluashon kontinuo pa asina mantené nan státus di kotisashon. Finalmente, nos ta spera di aklará kualke malkomprondementu ku por aparesé den bo mente tokante e siguridat i status di e kotisashonnan.

E ambiente di regulashon den kua DCSX ta operá ta ankrá den un régimen di supervishon polifasético ku supervishon di representantenan lokal aktivo di intermediarionan finansiero di reputashon ku ta forma e Fundashon DCSX, e Banko Sentral di Kòrsou i Sint Maarten kual ta e reguladó final, e DCSX Hunta di Supervision ku ta supervisá e operashonnan diario i finalmente i hopi importante , e ordenansa lokal ku ta stipulá e governance i guia pa e Reglanan di e Bolsa. Importante tambe ta e normanan di entidatnan internashonal manera e Organisashon pa Koperashon i Desaroyo Ekonómiko (OECD), Financial Action Task Force (FATF) pa Europa i Karibe, entre otro. E organisashonnan aki ta stipulá reglanan i mihó práktikanan internashonal ku DCSX i su kotisashonnan aprobadó – inkluso kotisashonnan tékniko – mester kumpli kuné, pa motibu di e presensia operashonal di e Bolsa riba Kòrsou i e hecho ku Kòrsou ta un firmante di e akuerdonan / areglonan di e organisashonnan aki. Dor di e aplikashon operashonal di e

normanan aki i e struktura di corporate governance di dos nivel di e Bolsa, DCSX por garantísá kumplimentu ekivalente ku otro Bolsanan internashonal di eskala relativamente chikitu similar ku ta operá den e merkado di kotisashon tékniko aki.

Pa kualke Bolsa i pues pa e DCSX tambe, un di e metanan príncipal ora ta krea un proceso di kotisashon ta pa proveé un balansa rasonabel entre petishonnan pa informashon/dokumento – ku ta sirbi pa duna invershonistanan potensial tur informashon ku nan lo por tin mester pa tuma desishonnan di invershon prudente tokante e papel di balor kotisá – i un proceso di kotisashon eficiente ku lo no deskonsehá emisornan potensial pa motíbu di e eksigensianan di kotisashon inkonveniente. Pues, DCSX mester pèrkurá pa su eksigensianan di kotisashon ta kumpli ku mihó práktikanan posibel internashonal pa proveé un nivel adekuá di garantia pa invershonista turesten sigurando ku e Bolsa tòg ta keda un opshon atraktivo i eficiente pa emisornan potensial, ku pa gran parti ta kompanianan di tamaño chikitu pa mediano ku kisas no tin e rekursenan pa por karga un proceso pisá I karo.

Promé ku kompanianan lokal òf internashonal por buska kotisashon riba e DCSX, nan ta wòrdú someté na evaluashon estrikto dor di un asina yamá “Komishon di Kotisashon” spesial. Dokumentashon ku mester wòrdú proveé ta inklui e “Memorandum di Invershon òf Informashon”, den algun otro pais, e dokumento aki ta wòrdú referí na dje como e Prospectus. Un tal documento, ta un di e eksigensianan príncipal di kualke proceso di kotisashon como ku e ta duna detayenan ku ta aklará tur informashon relevante tokante e kotisashon potensial. E ta inklui informashon tokante e tim di maneho i e poderantenan ku ta responsabel pa e operashon di e kompania i su kotisashon, si fondonan ta wòrdú rekoudá pa kiko nan lo wòrdú usá, e corporate governance di e kompania, e posishon finansiero i stabilitat di e kompania, e ekspektativa pa ganashi, etc. Dokumentonan adishonal ku mester wòrdú presentá normalmente ta inklui e sifranan finansiero kontrolá dor di un akoutent di por lo mémos dos aña. E sifranan finansiero kontrolá mester kontené un opinion kualifiká di un akountent kualifiká. Den otro palabra, e akountent mester a repasá e sifranan finansiero di e kompania i konfirmá ku e sifranan di e kompania ta eksakto o alomenoso no tin indikashon ku esaki no ta e kasos. Importante ta tambe, ku DCSX ta eksigí tres deklarashon firmá, dos di kua mester wòrdú presentá pa e gerentenan di e kompania ku ta buska státus di kotisashon, i e otro mester wòrdú presentá pa e konsehero di kotisashon ku ta asistí e kompania emisor. E deklarashonnan aki ta duna konfirmashon ku e gerentenan i pues e kompania ta i lo sigui kumpli ku e reglanan di e Bolsa i ku tur dokumento i informashon proveé ta eksakto i kompleto.

E proeso di kotisashon por ta bastante tékniko i ku bon motibu pasobra e mester sigurá mas mihó posibel ku e kompania ku ta buskando kotisashon ta den bon kondishon i ku e gerente i ofisialnan responsabel di e kompania tin bon reputashon i ta hendenan ku ta obedesé lei. Tur esaki ta pa sigurá un nivel haltu di integridat pa e Bolsa, e industria finansiero lokal i e ambiente di negoshi kompleto di Kòrsou. En esensia, pa sigurá ku invershonianan manera boso ta sinti bo seif dor di sa ku bo interes ta protehá lo mas tantu ku ta realistikamente posibel.

Adishonal na e eksigensianan i dokumentonan ariba menshoná, ta eksistí eksigensianan kontinuo ku ta wòrdú eksigí di tur papelnan di balor kotsá pa mantené e státus di kotisashon aki. Un di e eksigensianan aki ta pa kumpli ku e Reglanan i Regulashonnan di e Bolsa. E Reglanan i Regulashonnan ta inkluí suministro di informashon, riba un base periódiko, tokante e performance di e kompania i su sifranan financiera i tambe informashon tokante transakshonnan importante, e akshonistanan i kambionan den maneho òf e huntá di direktiva, entre otro. DCSX su meta final, pues, ta pa fasilitá diferente tipo di kotisashon ku ta konsistente ku e leinan di e pais i pa hasi nan disponibel na invershonia dentro di un merkado regulá.

Sigui Skina di Invershonia pa tur kos ku bo mester sa tokante Kreashon di Rikesa!

E editorial aki a wòrdú presentá na bo pa e DCSX ku kolaborashon di Vertex Investments.

Outor di e publikashon aki: Stephanie Shaw CFA, MBA.

